

28 OCT 1998

DR MAHATHIR HADIR MAJLIS MAKAN MALAM PERBENDAHARAAN

KUALA LUMPUR, 28 Okt (Bernama) -- Perdana Menteri Datuk Seri Dr Mahathir Mohamad yang juga Menteri Kewangan Pertama malam ini menghadiri majlis makan malam sempena pembentangan Belanjawan 1999 di Parlimen baru-baru ini.

Dr Mahathir diiringi Datin Seri Dr Siti Hasmah Mohd Ali ke majlis itu yang diadakan di Dewan Merak Kayangan Felda Jalan Semarak di sini.

Majlis itu adalah acara tahunan Kementerian Kewangan sejak awal 1970-an. Ia dibuat bagi meraikan kakitangan kementerian yang terlibat secara langsung dalam penyediaan belanjawan negara.

Ini adalah kali pertama Dr Mahathir menghadiri majlis itu sejak menjawat jawatan itu pada 7 Sept berikutan pemecatan Datuk Seri Anwar Ibrahim lima hari sebelumnya.

Turut hadir Menteri Kewangan Kedua Datuk Mustapa Mohamed, kedua-dua timbalan menteri Datuk Wong See Wah dan Datuk Dr Affifuddin Omar, Ketua Setiausaha Negara Tan Sri Abdul Halim Ali dan Gabenor Bank Negara Tan Sri Ali Abul Hassan Sulaiman.

Kira-kira 400 kakitangan jabatan-jabatan di bawah kementerian itu hadir pada majlis itu.

-- BERNAMA

NM oba